

四庫全書

子部

欽定四庫全書

冊府元龜卷六百二十

宋王欽若等撰

卿監部

總序

卿監之職其來尚矣三代以前雖名號或殊然其典領亦可得而言焉少昊氏以九扈為九農正及帝堯命棄為后稷並司農卿之本也

凡此已下事  
備邦計總序

又以五鳥為五

工正及云共工方鳩僝功皆將作監之本也又以鳳雉

氏為歷正及顓頊命南正重司天北正黎司地唐虞以

羲氏和氏紹重黎之後皆太史監之本也

凡此已下事  
備國史總序

又命伯夷為秩宗后夔典樂並太常卿之本也

凡此已  
下事備

掌禮  
總序

臯陶作士即大理卿之本也

凡此已下事  
備刑法總序

又命益

作虞以掌山澤即都水使者監之本也夏制九卿商氏

因之周之卿曰少師少傅少保冢宰司徒宗伯司馬司

寇司空是也三代諸卿名號不同然其官職之屬相沿

而乃與周不異天官大府下大夫乃大府卿之本也此

已下事備  
邦計總序

又庖人外饗中士蓋光祿卿大官署令之本

也膳夫內饗即殿中監之尚食局之本也地官師氏以

三德三行教國子即國監之本也

凡此已下事  
備學校總序

又林衡

川衡二官掌林麓川澤亦都水監之任也又廩人下大

夫亦司農之太倉令也春官宗伯卿一人亦太常卿也

小宗伯掌三族之別以辨其親疎即宗正之別也太史

掌建邦之六典亦太史局令之職也又校人圉師趣馬

皆若太僕之典廐署令也又司甲司弓矢下大夫司兵

中士司戈下士並衛尉之武庫令也秋官司寇亦大理之列也又大行人中大夫掌大賓客之禮及象胥即鴻臚之本也冬官考工亦將作監之任也其攻金之工六

即少府監之掌治署令也

凡此已下事備邦計總序

秦置太史令又

置奉常其郎中令主郎內諸官掌宮殿掖門戶衛尉掌

輿馬官

衛尉之名自此始也

廷尉掌刑辟典客掌歸義蠻夷宗正

掌親屬

宗正之名自此始也

少府掌山海池澤之稅

少府之名自此始也

自

奉丞而下皆有丞以屬焉其左右中候將行皇后卿也

又有典屬國掌蠻夷降者漢以太常光祿勳衛尉太僕

廷尉大鴻臚卿宗正司農少府謂之九寺大卿而分屬

三司

太常光祿勳衛尉三卿並太尉所部太僕廷尉大鴻臚三卿並司徒所部宗正大司農少府三卿並

司空之所部

奉常初曰太常

太常之名自此始也其所典掌沿革及官屬增省並具掌禮總

序他皆類此

太僕

或曰周官有太僕下大夫掌王之服位出入王之命似非今太僕之職又云周穆王

置太僕正以伯冏為之掌輿馬秦因之漢則夏侯嬰為沛公太僕

屬官有大廐未央家

馬三令各五丞一尉又車府路軫騎馬駿馬四令丞又

龍馬閑駒橐泉駒駘承華五監長丞右邊郡六牧師苑

令各三丞又牧橐昆號令丞皆屬焉中太僕掌皇太后

輿馬不常置也又少府增置屬官焉

其屬所典掌沿革及員吏增省具邦

計總序他皆類此

惠帝更名太常曰奉常景帝初衛尉更名中

大夫中六年更名廷尉為大理

大理之名自此始也其典領沿革及屬官省增

并具刑法總序佗皆類此

又更名典客為大行令又更名將作少監

為將作大匠屬官有右庫東園主章左右前後中校七

令丞又有主章長丞更名將行為大長秋後元年治粟

內史更名大農令是年以中大夫令復為衛尉屬官有

公車司馬衛士旅賁三令丞衛士三丞又諸屯衛候司

馬二十二官皆屬馬長樂建章甘泉衛尉皆掌其宮各隨

所掌之職畧同不常置孝武帝建元三年初置光祿勳官名馬

之屬官比郎無員多至十人有僕射秩比千石四年改

大理復為廷尉元狩三年昆邪王降增屬國置都尉丞

候千人屬官有九譯令五年初置郎中令之屬官諫大

夫秩比八百石大初五年更名郎中令為光祿勳光祿之名

自此始也屬官有大夫郎謁者皆秦官又期門羽林皆屬馬



是年更太僕家馬為桐馬初置路軫其少府太常並增

置屬官焉又大行令更名大鴻臚

鴻臚之名自此始也

屬官有行

人譯官別火三令丞及郡邸長丞又更名行人為大行

令又更名將作屬官東園主章為木工又大農令更名

大司農

司農之名自此始也其所典掌沿革及屬官增省並具部計總序他放此

又置太史

公之職

其所典掌具國史總官他皆類此

宣帝以光祿勳之屬官中郎

將騎都尉監羽林秩比千石成帝河平元年省典屬國

并大鴻臚陽朔三年省將作中候及左右前後中校尉

五丞哀帝元壽二年改廷尉復為大理平帝元始元年以光祿勳之屬官比郎更名虎賁郎置中郎將秩比二千石四年更名宗正為宗伯屬官有都司空令丞內官長丞又諸公主家令門尉皆屬焉後漢太常卿一人中二千石以下諸卿秩同光祿勳卿一人中二千石掌宿衛宮殿門戶典謁署郎更直執戟宿衛門戶考其德行而進退之郊祀之事掌三獻有員吏四科百石斗右佐驅吏學士守學士官醫衛士等屬焉丞一人比千石五官中郎

將一人比二千石五官中郎比六百石無員郎年五十  
以屬五官五官侍郎比四百石無員五官郎中比三百  
石無員凡郎官皆主更直執戟宿衛諸衛門出克車騎  
唯議郎不在直中左中郎皆比二千石主左署郎中郎  
比六百石侍郎比四百石郎中比三百石三郎皆無員  
左中郎將比二千石主右署郎中比六百石侍郎比四  
百石郎守比三百石二郎皆無員虎賁中郎將比二千  
石主虎賁宿衛左右僕射左右陞長各一人比六百石

僕射主虎賁郎習射陞長主直虎賁朝會在殿中虎賁  
中郎比六百石虎賁作郎比四百石虎賁郎比三百石  
節從虎賁郎比二百石四郎皆無員掌宿衛侍從自節  
從虎賁郎久者轉遷才能差高至中郎羽林中郎將比  
二千石羽林郎比三百石無員掌宿衛侍從常遷漢陽  
隴西安定北地上郡西河凡六郡良家補武帝以  
便馬從游獵還宿殿階巖下室中故號巖郎羽林左監  
一人六百石主羽林左騎羽林右監一人六百石主羽

林右騎丞一人奉車都尉比二千石無員掌御乘輿車  
駙馬都尉比二千石無員掌駙馬都尉二千石無員本  
監羽林騎光祿大夫比二千石無員凡大夫議郎皆掌  
顧問應對無常事唯詔命所使大中大夫千石無員中  
散大夫六百石無員諫議大夫六百石無員議郎六百  
石無員謁者僕射一人比千石為謁者臺率主謁者天  
子出奉引古重習武者主射以督祿之故曰僕射常侍  
謁者五人皆六百石主殿上時節威儀謁者三十人其

給事謁者四百石其灌謁都郎中皆三百石掌賓讚受  
事及上章報問初為灌謁者滿歲為給事謁者凡光祿  
勲職屬光祿者自五官將至羽林右監凡七署自奉車  
都尉主謁者皆以文屬舊有左右曹秩以二千石日上  
殿中主受尚書奏事平省之世祖使小黃門郎受事車  
駕出給黃門郎兼有請室令車駕出在前請所幸徼車  
迎白示重慎中興但以郎兼事訖罷又省車戶騎凡三  
將及羽林衛尉卿一人中二千石掌門官衛士官中徼

循事丞一人比千石公車司馬令一人六百石掌南宮  
闕門凡吏民上章四方貢獻及徵詣公車者丞尉各一  
人丞遷曉諱掌知非法尉主闕門兵禁戒非常南宮北  
宮衛士令各一人並六百石各有丞一人左右都候各  
一人六百石主劔戟士徵循宮及天子有所收考丞各  
一人宮掖門每門司馬一人皆千石南宮南屯司馬主  
平城門北宮門蒼龍司馬主東門貞武司馬主貞武門  
北屯司馬主北門北宮朱雀司馬主南掖門東明司馬

主東門朔平司馬主北門自卿至諸門司馬咸有員吏

衛士屬焉中興省旅賁令衛士一人丞

右三卿大尉所部

太僕

卿一人中二千石掌車馬天子每出奏駕上鹵簿用大  
駕則執馭丞一人比千石考工令主作兵器弓弩刀鎧  
之屬成則傳執金吾入武庫及主織綬諸雜工車府令  
主乘輿諸車未央廐令主乘輿及廐中諸馬各一人六  
百石長樂廐丞一人自卿以下並有員吏等屬馬太僕  
舊有六廐皆六百石令中興省約但置一廐後置左駿



令廐別主乘輿御馬後或并或省又有牧師苑令官主  
養馬分在河西六郡界中中興皆省惟漢陽有流馬苑  
但以羽林郎監領廷尉卿一人大鴻臚卿一人掌諸侯  
及四方歸義蠻夷其郊廟行禮贊道請行事既善以命  
郡司諸王入朝當郊迎典其禮儀及郡國上計主四方  
來亦屬焉皇子拜立贊授印綬及拜諸侯諸侯嗣子及  
四方夷狄封者臺下鴻臚召拜之王薨則使吊之及拜  
王嗣丞一人比千石大行令一人六百石主諸郎丞一

人治禮郎四十七人主齋祀儉讚九賓又有宮室主調中都官斗食以下功次相補大行郎而如謁者兼舉形

貌也其譯官別火二令丞及郡邸長丞並省但令郎治

郡邸

右三官司徒所部也

自卿以下各有員吏等屬焉宗正卿一

人掌序錄王國嫡庶之次及諸侯宗室親屬遠近郡國

歲因計上宗室名籍若有犯法當髡以上先上諸宗正

宗正以聞乃報決又歲治諸王世譜差序秩第

又有員吏以下

官屬

所統家令一人六百石丞一人三百石其餘屬吏

增減無常主簿一人秩六百石僕一人秩六百石私府  
長一人秩六百石家丞一人三百石直史三人從官三  
人其主薨無子置傅一人守其家宗正自中興省都司  
空令丞大司農少府卿各一人世祖改少府屬司農初  
孝武置水衡都尉秩比二千石別主上林苑有離宮燕  
休之處世祖省之并其職於少府又孝武以都水官多  
乃置左右使者以領之劉向護水使者是也至哀帝省使者官至  
東京凡都水皆罷之併置河隄謁者桓帝延熹二年始

置秘書監一人

秘書之名自此始也

掌禁中圖書秘記故曰秘書

屬太常後省

秦時博士官所職禁人藏書漢氏除挾書之律開獻書之路置寫書之官又令謁書

陳農求遺書於天下故文籍往往而出並藏之書府在外則有太史博士掌之其內則有延閣廣內石渠之藏大御史中丞在殿中掌蘭臺秘書圖籍又未央宮中有麒麟閣天祿閣亦藏書劉向楊雄典校皆在禁中謂之中書猶言內庫書東京則藏之東觀亦禁中也其著作局事具國史自此以下不復述

獻帝建安

末改光祿勳為郎中令魏之九卿並與漢同初武帝為魏王置秘書令及二丞典尚書奏事即中書之任也兼掌圖書秘記又置秘書郎秩四百石又置秘書校書郎

蘭臺亦藏書御史掌馬薛夏云蘭臺為外臺秘書為外閣是也初秘書屬少府及王肅為監以為秘書之職即漢東觀之任安可復屬少府自此之後不復屬焉 太史令吏員有監候郎二十

人候部吏十五人掌候天文並太史監候之任也又有

靈臺丞主候望郎殿中監一人品第七

殿中之名自此始也晉宋並因

之掌帳設監護之事又有殿中奉乘郎從五品下又光

祿置太官令丞太僕置乘黃丞一人奉乘郎從五品又

有驛駟廐令牧官都尉其宗正亦以宗室居之又以廷

尉為大理後復為廷尉又改鴻臚之大行令為客館令

又并將作之左校於材官又以水衡都尉主天下水軍  
舟船器械文帝黃初元年改郎中令復為光祿勳又分  
秘書立中書因置監令明帝青龍中議秘書丞郎職近  
日月宜居三臺上亞尚書丞郎其校書郎自是以後往  
往以他官典校秘書衛尉闕其太常司農少府此不復  
述晉制太常光祿勳衛尉太僕廷尉大鴻臚宗正大司  
農少府將作大匠太后三卿太常秩皆為列卿各置丞  
功曹主簿五官等員其太常兼統太學諸博士祭酒及

太史別置靈臺丞武帝咸寧四年初立國子學定置祭

酒一人

其所典領沿革及屬官增損並具學校部總序他皆倣此

光祿勳統虎賁中

郎將羽林郎將冗從僕射羽林左監五官左右中郎將

東園匠大官御府守宮黃門掖庭清商華林園暴室等

令又置左右光祿大夫而光祿大夫如故光祿大夫銀

章青綬其重者加金章紫綬則謂之金紫光祿大夫秩

比二千石大官令之屬有廚史錫官吏果官監釀吏酒

丞等員衛尉統武庫公車衛士諸治等合左右都候南

北東西督治掾太僕統典農典虞都尉典虞丞左右中

典牧都尉車府典牧乘黃廐驎駟龍馬廐等令典牧又

別置羊牧丞

太僕自元帝渡江之後或省或置太僕省故驎駟為門下職宋齊亦有若郊祀則權

宜置太僕執轡事畢省齊亦如之將作大匠有事則置無事則省其丞亦

然所屬有曹主簿五官等員掌土木之役都水臺都水

使者一人掌舟楫之事官品第四又有左右前後中五

水衡

陳慎戴雄俱以都水使者領水將都尉之職

又有參事二人蓋丞之職

也又置主簿一人又諸津渡二十四所各置監津吏三



十一人太后三卿衛尉少尉少府太僕漢置皆隨太后  
官為官號在同名卿上無太后則闕魏改漢制在九卿

下晉復舊在同號卿上大長賢一梁冠絳朝服

江左以他官兼

領宋齊梁陳後魏北齊亦然

其吏員有典歷四人武帝以秘書并中

書其丞謂之中書秘書丞惠帝永平元年詔秘書典總  
經籍考校古今中書自有職務遠相統攝於事不專宜  
令復別置秘書寺掌中外三閣圖書自是秘書寺始外  
置焉品第五絳朝服銅印墨綬進賢兩梁冠佩水蒼玉

又置秘書丞二人品第六銅印墨綬進賢一梁冠絳服

江左省殿中尚衣局又省衛尉又省鴻臚丞及功曹主

簿五官等員

有事則權置  
事畢則省

又省尉衛之治令始隸少府

又省將作大匠而作左右校隸少府又大史之職自此

多以他官兼領

宋齊梁  
陳並同

哀帝興寧二年以光祿勳并司

徒孝武寧康元年復置光祿勳又省都水臺置水衡令

亦無丞宋九卿亦沿舊制秘書丞一人品服同晉秘書

郎中去中字光祿勳丞祖朝會宗正不置

齊亦  
然

又省太

僕丞

齊亦如之

永初中大鴻臚分置南北客館令丞孝武孝

建元年復置衛尉又增置丞一人又省都水臺署水衡

令亦無丞大明中改殿中尚方曰左右御府各置令丞

一人齊九卿並因前制秘書郎秩六百石又置內外殿

中監各八十人太僕乘黃令品第七秩四百石銅印墨

綬進賢一梁冠絳朝服又鴻臚有客館令光祿勳府置

丞領左右光祿大夫位從公開府置佐吏如公中大夫

中散大夫諸大夫官皆處舊齒老年重者加親信二十

人復置都水臺使者一人將作大匠太僕三卿不常置  
有事權置兼官畢乃省宣德尉衛少府太僕爵林王立  
文安太后即尊號以宮名置之大長秋亦爵林立皇后  
置梁高祖天監七年象四時置十二卿太常宗正司農  
為春卿太常位視金紫光祿大夫班第十四宗正卿位  
視列曹尚書皆以宗室為之班第十三其丞為四班主  
簿為七班司農卿班第十一大府少僕少府為夏卿大  
府班第十三

大府自周官以後歷代不置然其職在司農少府至是方置焉

太僕卿統

南牧左右牧龍廐外班第十其丞視朝請班第三主簿  
班第三少府班第十一衛尉廷尉大匠為秋卿衛尉班  
第十三統武庫令廷尉第十二將作為大匠卿班第十  
品正第五又置丞一人班第三又置將作營作又別立  
長史司馬主簿各一員光祿勳鴻臚都水使者為冬卿  
光祿除勳字班第十一光祿丞視員外郎主簿班第三  
其大官丞門下省領之又有市買正厨酒庫等丞鴻臚  
卿班第九品從第五其丞班第三主簿班第三屬官又

有典客館令丞令在七班下為三品勲位又改都水臺  
使者為大舟卿班第九又置丞一人班第一又置主簿  
七班之中第三又秘書監增秩中二千石品第三後置  
十八班秘書監第十一又增秘書丞品第五秘書郎自  
江左多任貴游年少迨茲尤甚太史丞為三品勲位又  
殿中位不登七班者別置勲位殿中外監為三品勲位  
內監為三品勲位又尚藥自此以降皆太醫兼其職陳  
諸卿監率如梁制後魏秘書監

初從第一品中孝文  
太和末降為第三品丞

一人正第五品上郎置四人正第七品上校書郎置十  
二人其太史丞史失其品殿中監從五品下又有掌服  
郎從六品上又有乘黃車府令掌太僕亦殿中之職也  
太常初置少卿又分一官令尚食中尚食掌知御膳尚  
食門下省領之中尚食集書省領之大官掌知百官饌  
光祿卿領之有丞一人衛尉卿從第一品下後降為第  
三品初置少卿官第三品上後降為正四品上從五品  
中後降為第七品上宗正卿第二品上少卿第三品後

降為四品丞第七品太僕卿第二品上少卿第三品上  
後降為正四品上丞從五品中後降為七品上又省乘  
黃令丞廷尉卿第二品上鴻臚卿第二品上後降為第  
三品少卿一人第三品上後為正四品上丞從五品中  
後降為第七品典客監從五品上又置主客令及司儀  
官大司農第二品上將作大匠從第二品後降為從三  
品其丞從五品後降為第五品下分建都水使者正第  
四品中水衡都尉從五品中後改都水使者從五品而



省水衡又有都水參事六人其少府改為太府焉北齊  
秘書郎增中字正第七品下校書置十二人始置正字  
四人從第九品上門下省屬官有殿中局殿中監四人  
掌駕前奉引行事東耕則進耒耜又統六局有典御二  
人丞監各四人文集書省統二局有中尚食局典御一  
人監四人品與尚食同又統尚藥局有典御二人侍御  
師四人尚藥監四人總御藥之事又以太常光祿衛尉  
宗正太僕大理鴻臚司農太府寺是為三府

九卿稱寺自此始也

太常寺卿第三品

餘卿品同

光祿寺置卿掌諸膳食帳幙器

物肴藏丞一人從六品下又有功曹五官主簿等又有大官丞一人肴藏令及丞二人又有清漳令丞主造酒衛尉寺有丞一人從六品下又有主簿及統武庫署令丞掌甲兵及吉凶儀仗又有守宮令丞掌凡設張之事宗正四卿有昭真寺掌釋道二教置大統一人都維郡三人亦有功曹主簿員以管諸州縣沙門太僕寺丞一人從六品下主簿一人統驛騶左右龍左右牝牛司

羊乘黃車府等署令丞鴻臚寺統典寺署有丞一人第七品下又有功曹五官主簿班第三又有典客令丞司儀令丞其大理司農太府此不復述又有都水臺使者二人從第五品有丞及參事河隄謁者錄事船局都津尉丞典作津長等員後周卿監之職咸準周官建置焉武帝四年置軍器監軍器有監自此始也隋九寺卿與北齊同其秘書監正第三品與尚書門下內史殿中為五省領著作太史二曹丞一人正第五品秘書郎中復除中字正

七品上置校書郎十二人太史曹置太史令二人從第七品上丞二人正第九品上又有司厯二人厯博士一人監候四人又置天文博士司辰等員殿中監為殿內局置監二人正六品下又有門下省統尚食藥御府等局監各有員屬太常寺卿一人正三品少卿正四品卿丞正七品下餘卿品亦如之光祿寺卿一人統太官有藏良醞掌醞等署令丞開皇三年廢光祿入司農十三年復置又加置丞三人又有主簿錄事並流外為之衛尉寺卿

一人掌軍器儀仗帳幙以監門衛掌宮門屯兵統武庫

令及行臺書省武器監守官署令

各有丞以下官屬餘卿亦如之

宗正

寺卿一人有少卿丞主簿等員又置崇真令丞各一人

太僕寺卿統驂駟乘黃龍廐車府典牧羊牛等署各有

令丞等員鴻臚卿一人統典客司儀崇真等三署令丞

開皇三年省並太常十三年復置其大理司農太府等

卿並各一人又有都水臺開皇三年省並司農十三

年復置仁壽元年改為都水監

都水名監自此始也

有丞二人正

第八品上又有掌船局都尉一人將作大匠一人開皇

二十年改將作為監以大匠為大監

置監之名自此始也

置副監

一人丞主簿各二人又領左右校署令丞煬帝即位改

國子學為監

置監之名自此始也

又降秘書監為從第三品置少

監一人四品掌貳秘書監之職後改秘書監為秘書令

少監為少令又加秘書郎為從第五品減校書郎為十

人又改太史曹為太史監進令階為第五品又減太史

丞一人從第七品上又增監候為十人又改司辰為師

本屬武候府令隸於太史局又分門下省尚食尚藥御  
府殿內等局正四品統尚食尚藥尚舍尚衣尚乘尚輦  
等六局又置少監一人從四品丞一人從五品改典御  
為奉御兼置直長等員以屬焉太常寺加置少卿二人  
又兼光祿卿為從三品加置少卿一人降為從四品加  
丞為從五品其餘少卿丞  
差降咸准此又改宗正之佛寺為道場道  
觀為真壇各置監丞又減太僕之驛騶署及殿中省尚  
乘局又有左右駁卓二廡加置主乘司庫司廩官又改

鴻臚之典客為典藩署又於建國門外置四方館以待

四方使者各掌其方國及互市事又分太府寺卿置少

府監

置監之名自此始也

又改將作大監少監為大匠小匠旋復

為大監少監後又為大令少令又改都水監為使者尋

又為監加置少卿後又改為令統舟楫河渠二署又以

都水丞為從七品又置主簿一員又改船局都尉為舟

楫署令有丞二人又置河渠署令丞各一人唐制秘書

監一人從三品掌邦國經籍圖書文庫有二局一曰著



作二曰太史皆率其屬而修其職少監二人為之二丞

一人掌判省事屬官有秘書郎掌四部之圖籍分庫以

藏之以甲乙丙丁為之部目主事二人掌印并句簡稽

失

其他卿監少丞主事以次典掌亦然然其下亦各本令史書令史等員

校書郎正字皆

掌讐校典籍刊正文

其下各有校理典書楷書手亭長掌因執紙裝潢匠筆匠等員

太史局令掌觀察天文稽定歷數凡日月星辰之變風

雲氣色之異率其屬而占候焉丞三人

其下亦有所統令史等員

司厯保章正監候靈臺郎天文生挈壺正人刻傳士漏

刻生典鐘典鼓等員殿中省監一人掌服御之事總尚  
食尚藥尚衣尚舍尚乘尚輦六局之官屬備其禮物而供其  
職事少監二人為之貳丞二人主事二人太常寺卿一

人正三品

其下各有少卿  
主簿錄事等員

光祿寺卿一人從三品

餘

品並同 掌邦國酒醴膳饍之事總大官珍饍良醞掌醞四

署之官屬修其諸備謹其出納少卿為之貳衛尉寺卿  
一人掌邦國器械文物之事總武庫武器守宮三署之  
官屬少卿為之貳宗正等卿一人掌九族六親之屬籍

以別昭穆之序并領崇真署少卿為之貳太僕寺卿一人掌邦國廐牧車輿之政令總乘黃典廐典牧車府四署及諸監牧之官屬少卿為之貳大理寺卿一人鴻臚寺卿一人掌客及凶儀之事領典客司儀二署以率其官屬而供其職務少卿為之貳司農寺卿一人太府寺卿一人少府監一人其北都軍器監一人掌膳造甲弩之屬辨其名物審其制度以時納于武庫少監一人為之貳

其屬有丞及主簿錄事府事等員

將作監一人匠一人掌供邦國

修建土木工匠之政令總四署三監百工之官屬以供

其職事少匠為之貳

其屬有丞及主簿錄事府史計史亭長等員

其都水監

使者二人掌川澤津梁之政令總舟楫河渠二署之官

屬

其下有丞及主簿錄事府史亭長等員

自高祖武德初改秘書令少復

為監政太史監為局又改殿中監為省又改都水監為

署使者監為都水令隸將作又置諸津令丞其在京兆

河南界者隸都水監在外者隸當州界又置軍器監貞

觀中廢軍器監併入少監改都水署為都水使者高宗

永徽中加置光祿寺供膳至二千四百人又始置衛尉  
武器署以主器仗又加太僕丞一人顯慶二年廢雒陽  
總監改青城宮監為東都苑北面監明德宮監為東都  
苑南面監雒陽宮農圃監為東都苑東面監食貨監為  
東都苑西面監高宗龍朔二年改秘書省為蘭臺其監  
曰蘭臺侍史少監為蘭臺侍郎丞為蘭臺大夫又改大  
史局為秘書閣局令為秘書郎中又改殿中省為中御  
府監為中御大監少監為中御少監丞為中御大夫又

改尚食為奉膳局奉御大夫尚藥為奉醫大夫尚衣為

奉冕大夫尚舍為奉宸大夫尚乘為奉駕大夫尚輦為

奉輦大夫又改太常卿為奉常正卿

其卿少卿丞及諸寺少卿丞等咸亨

光宅神龍并隨曹改復光祿為司宰正卿衛尉為司衛寺正卿宗

正為司屬寺正卿太僕為司馭寺正卿大理為詳刑寺

卿大理正為詳刑大夫鴻臚為司文正卿司農為司稼

寺正卿大府為外府正卿又改國子監為司成館國子

監祭酒為大司成司業為少司成又東都國子監置學

官學生分於兩京校授又改少府監為內府監將作為  
監繕工監大匠為大監又改都水使者為司津使者監  
咸亨元年秘書省監少監丞及太史局令等悉復舊又  
復殿中省監少監丞及六尚之名其奉常司宰司衛司  
屬司馭詳刑司文寺司稼外府司成內府膳工大監等  
悉復舊名又復司津使者監為都水使者監則天光宅  
元年改太常為司禮光祿為司膳衛尉為司尉宗正為  
司屬太僕為司僕大理為司刑大理正為司刑正鴻臚

為司賓太府為司府寺卿司農不改國子監為成均監  
少府為上方監將作為營繕監垂拱中又改都水監為  
水衡置都尉使者為都水府天授初改秘書為麟臺久  
視元年改太史局為渾天監不隸麟臺其令監置一人  
加至正第五品上因加副監及丞主簿府史等員其年  
又改為渾儀監始置丞二人從第七品上長安二年改  
渾儀監復為太史局還隸麟臺緣監置官及府史等並  
廢其監依舊令置二人又省丞二人四年省太史局歷



博士置保章正以當之掌教歷生又省天文博士之職  
置靈臺郎以當之是年始置挈壺正又去司辰之師字  
但曰司辰中宗神龍初改麟臺復為秘書又改太史局  
為太史監令名不改不隸秘書又復太常之名其光祿  
衛尉宗正太僕大理鴻臚大府等九寺國子少府將作  
等三監並如故又以水衡都尉復為都水監署使者二  
人分總其事不屬將作領舟楫河渠二署又改都水府  
復為使者景龍二年復置太史丞二人明皇開元初復

以少府監甲弩坊地置軍器使二年又令太史令為太

史監又分少府監甲鎧弓弩別置軍器監置中校署

屬將

作三年以軍器使為監領甲弩二坊十二年省軍器監

作並隸少府監甲弩坊更置少監一員統之又置北京

軍器庫十四年又改太史監為局復云太史令二員隸

秘書省十六年置軍器監於北都

常以太原尹兼領

二十五年

廢北京軍器庫依舊為甲坊太常所掌諸陵廟並隸宗

正及道士女道士屬宗正故崇真署亦隨而隸焉其僧

尼別隸尚書祠部天寶六載復軍器監於舊所置監一人領甲坊弩坊兩署九載置廣文館領國子監馬十二載改將作大匠復為大監肅宗乾元元年又廢軍器監却置使其監以下並停

其使以內官為之

宣宗大中四年以司

農寺文案少卿不通判詔自今以後九寺三監少列並與大卿通判後唐莊宗同光中諸寺監各只置大卿監祭酒司業各一員博士兩員其餘官屬並權停惟太常寺及大理寺事關禮法之重除太常博士外更置丞一

員大卿等分職監局居方在於事任無不總統然則因時而沿革隨世以輕重外降秩序分併官曹治亂在人名器非假若乃職修事舉德崇望峻方正不撓廉約自守挺愛君之節敦及善之道被委遇而斯稱荷寵擢而無忝以從人爵允奉官箴其有使辟任志叨黷靡厭用取譴咎欲悔何及凡卿監部十有五門云

選任

舉職

恩獎

選任

夫卿監之列其位重矣官象河海職貳台袞苟非其人  
焉可虛授然則使僻側媚羣言之攸棄中正清直公朝  
之所尚則有內貞外順博聞多識推行實之攸異稱治  
迹之第一膺茲僚簡寘于周行故得庶務允釐百官承  
式上下相維而天下化矣

周穆王命伯冏為周太僕正

伯冏名也太僕  
長大御中大夫

作冏命曰

慎簡乃僚無以巧言令色使僻側媚其惟吉士

漢高祖為沛公賜爵七大夫以夏侯嬰為太僕常奉車

為沛公 嬰自高祖初起沛嘗為太僕後事惠帝  
御車

朱邑為北海太守治行第一入為大司農

吳公為河南守文帝初立間吳公治為天下第一故與  
李斯同邑乃徵為廷尉

黃霸字次公少學律令為河南太守丞自武帝末用法  
深昭帝立俗吏上嚴酷以為能而霸獨用寬和為名會  
宣帝即位民間時知百姓苦吏急也聞霸持法平名  
以為廷尉正

杜業有才能選為太常

田序以連擒大姦徵為大鴻臚

後漢高詡以儒學徵拜大司農

陳寵為廣漢太守風聲大行入為大司農

陳球字伯真下邳人善律令橋玄表球明律令拜廷尉

正

白嵩為濟東相甘露降於郡安帝嘉其致瑞徵拜大鴻

臚

魏邢顒字子昂時人稱德行堂堂邢子昂文帝以為太常

嚴包以高才武帝黃初中入為秘書丞

梁習為并州二十餘年政治為天下最乃徵拜大司農  
蜀王謀漢嘉人有容止操行先主為漢中王用荆楚宿  
士零陵賴恭為太常南陽黃柱為光祿勳王謀為少府  
吳張儼弱冠知名早歷顯位以博聞多識拜大鴻臚使  
于蜀



晉華表字偉容仕魏為光祿勳咸熙中詔曰表清賢履道內貞外順歷位忠恪言行不玷其以表為太常卿

顧榮字彥先吳人也仕吳為黃門侍郎吳平入雒以南土秀望為廷尉正

陸士衡以文行為著作郎

嵇紹康子也以父得罪靖居私門山濤領選啟武帝曰康誥有言父子罪不相及嵇紹賢侔却缺宜加旌命請為秘書郎帝謂濤曰如卿所言乃堪為丞何但郎也乃

發詔徵之起為秘書丞

何嵩善史漢為著作郎

何楨字元幹廬江人也為尚書特詔參秘書丞秘書本  
有一丞時尚未轉遂以楨為右丞右丞之置自楨始也  
賀循元帝以為太常侍散騎常侍如故循以九卿舊不  
加官惟拜太常而已矣

宋王慧武帝初建宋國當置郎中令帝難其人謂傅亮  
曰今用郎中令不可令減袁曜卿也既而曰吾得其人

乃以慧居之

謝靈運為司徒徐羨之所惡出為永嘉太守稱疾去職  
文帝登祚誅徐羨之等徵為秘書監召不起帝使光祿  
大夫范泰與靈運書敦獎之乃出就職

劉恢為侍中領衛尉晉氏過江不置衛尉孝武欲重城  
禁故復置衛尉自恢為始也

南齊沈憲遷少府卿少府管掌市易與交關有吏能者  
皆更此職

梁劉孝綽自上虞令遷除秘書丞高祖謂舍人周捨曰  
第一官當用第一人故以孝綽居此職

張率字士簡吳郡人遷秘書丞高祖曰秘書丞天下清  
官東南胄緒未有為之者今以相處為卿定名譽

後魏杜銓京北人為中書博士初杜太后父豹喪在濮  
陽太武欲命迎葬於鄴謂司徒崔浩曰天下諸杜何處  
望高浩對京兆為美太武曰朕今方改葬外祖意欲取  
京兆杜中長老一人以為宗正命營護凶事浩曰中書

博士杜銓其家中今在趙郡是杜預之後於今為諸杜最即命詔之及見銓器貌瓌雅太后感悅謂浩曰此真吾所欲也以為宗正

于忠宣武時為衛尉卿高肇忌其為人出授定州刺史宣武既而悔之復授衛尉卿領左衛將軍恒州大中正密遣中使詔忠曰自比股肱禡落心膺無寄方任雖重比此為輕故輟茲外任委以內務當勲夙無怠稱朕所寄也

李輔字伯尚少有重名孝明每云此李氏之千里駒勃  
撰明定起居注尋遷秘書丞

後周盧誕本名恭祖仕魏為給事黃門侍郎魏帝以誕  
儒宗學府為當世所推乃拜國子祭酒

隋宇文愷好學多技藝為萊州刺史兄忻被誅除名於  
家久不得調會朝廷以魯班故道久絕不行令愷修復  
之既而高祖建仁壽宮訪可任者右僕射楊素言愷有  
巧思帝然之於是簡校將作大匠

蘇夔為朝散大夫時煬帝力勤遠略蠻夷朝貢前後相  
屬帝嘗從容為宇文述虞世基等曰四夷率服觀禮華  
夏鴻臚之職酒歸令望有多才藝美容儀可以接對賓  
客者為之乎咸以蘇夔對帝然之即日拜鴻臚少卿  
唐戴胄為兵部郎中貞觀初太宗謂封德彝曰大理之  
職人命所懸此官極妙選公宜陳其堪者德彝未對曰  
戴胄忠正清直每事用心即其人也於是除大理少卿  
楊崇禮為太府少卿雖錢帛充牣丈尺間皆躬自省閱

時議以為稱職擢拜太府卿

舉職

夫九卿者所以參三公也故歷世王者妙選英俊以充其任用舉其職繇是宗廟之禮斯備宮闕之制有典外夷之事明習朝廷之政有成量功以鈎較則物無遁形執詞而訊辨則情咸有得以至釐整記籍諧暢律呂攸司靡曠典故可稽彛倫是章功用克顯故得則哲之美皎如日星當官之譽芬若蘭芷則上法於北斗下括乎



河海復何媿馬

漢楊城延高帝時為少府作長樂未央宮築長安城先就以功封梧侯

常惠代蘇武為典屬國明習外國事勤勞數有功

陳咸為少府少府多寶物屬官咸皆鈎較發其姦賊沒

入辜權財物

辜罪也權專固也

官屬及諸中宮黃門鈎盾掖庭

官吏舉奏按論畏咸皆失氣

後漢劉般為宗正清靜畏慎受職修治

杜林為光祿勳內奉宿衛外總三署周密敬慎選舉稱  
平

孫堪為光祿勳清廉果於從政數有直言多見納用

鄭弘章帝時為大司農舊交趾七郡貢獻轉運皆從東  
治泛海而至風波艱阻沉溺相係弘奏開零陸桂陽嶠  
道於是夷通至今遂為常路在職二年所息省三億萬  
計時歲天下道早邊方有警人食不足而帑藏殷積弘  
奏宜省貢獻減徭費以利飢人帝順其議

應順為將作大匠公廉約已明達政事五年省費億萬  
趙喜字伯陽為衛尉盡心事上夙夜匪懈

魏韓暨黃初中為太常時新都雒陽制度未備而宗廟  
主祔皆在鄴都暨奏請迎鄴四廟神主建立雒陽廟四  
時蒸嘗親奉粢盛崇明正禮廢去淫祀多所規正

薛夏太和中為秘書丞常以公事移蘭臺自以臺也而  
秘書署耳謂夏為不得移也推使當有坐者夏報之曰  
蘭臺為外臺秘書為內閣一也何不相移之有蘭臺屈

無以折自是之後遂以為常

晉孔坦為廷尉卿獄多囚繫坦到官躬執詞狀口辨曲直大小以情不加楚撻臺司錄獄無所顧問皆面決當時之事

荀勗領秘書監與中書令張華依劉向別錄整禮記籍又立書博士置弟子教習以鍾胡為法時汲郡塚中古文竹書詔勗撰次之以為中經列在秘書

南齊沈憲字彥璋為都水使者長於吏事居官有績

梁蕭子顯大通三年以侍中領國子博士高祖所製經義未列學官子顯在職表置助教一人生十人又啟撰高祖所集并普通北代記其年遷國子祭酒又加侍中於學述高祖五經義

陳王伯固為國子祭酒學有惰游不修習者重加撻楚生徒懼焉繇是學業頗進

後魏崔振為長蕪廷尉少卿振有公斷以明察稱

高謚為秘書郎以墳典殘缺奏請廣訪羣書大加繕寫

繇是代京圖籍莫不審正

范紹為長兼太府卿紹量公節用甄煩就簡凡有賜給千疋以上皆別覆奏然後出之靈太后嘉其用心勅詔每月入見諸有益國利民之事皆令面陳

崔纂為廷尉正每於大尉多所據明有當官之譽

北齊崔昂為散騎常侍兼太府卿大司農卿二寺所掌世號繁劇昂校理有術下無姦偽經手歷目知無不為朝廷歎其至公又奏上橫市妄費事三百一十四條詔

下依啟狀速議以聞

宋游道為太府卿乃於少府覆簡主司盜截得鉅萬計  
奸吏返誣奏之下獄尋得出不歸家徑之府理事

後周斛斯徵為太常卿自魏孝武西遷雅樂廢缺徵博  
採遺逸稽諸典故創新改舊方始備焉

盧辯為太常卿自魏末離亂孝武西遷朝章禮度湮墜  
咸盡辯因時制儀皆合軌度性疆記默識能斷大事凡  
所創制處之不疑

長孫紹遠為大常廣召工人創造樂器土木絲竹各得其宜

隋蘇孝慈開皇初為太府卿于時王業初基百度伊始徵天下工匠纖微之巧無不畢集孝慈總其事世以為能

樊叔略為司農卿凡所種植叔畧別為條制皆出人意表

牛弘為秘書監表請分遣使人搜訪異本每書一卷賞



絹一疋校寫既定本即歸主於是人間異書往往間出  
宇文愷為營宗廟副監及遷都高祖以愷有巧思詔領  
營新都副監高頴雖總大綱凡所規畫皆出於愷

趙元淑為潁川太守因入廟會以司農不時納諸郡租  
穀元淑奏之帝謂元淑曰如卿意者幾日當了元淑曰  
如臣意不過十日帝即日拜元淑為司農卿納天下租  
如言而了帝悅焉

楊注為大理卿視事二日煬帝將親省囚徒其時繫囚

二百餘人注通宵究審詰朝而奏曲盡事情一無遺誤  
帝甚嘉之

唐柏季慕武德中歷屯田農圃監再為司農少卿每督  
事苑內小心畏慎勤於稼穡高祖每稱善

張道源為太僕卿上奏以吏曹文簿繁密易生姦隱請  
議減之高祖下其議百寮無同者惟傅奕以道源為深  
識政體宜從其說高祖亦稱言為當迫於衆議事竟不  
行

柳亨為光祿少卿太宗每誡之曰與卿舊親情素兼宿  
卿為人交游多今授此職宜存簡靜亨性好射獵有饗  
酒之名此後頗自勗勵杜絕賓客約身節簡勤於職事  
太宗亦以此稱之

姜確為將作少匠轉殿中少監攝將作並以勤濟見稱  
修九成宮令確典其事拜宣威將軍守屯衛將軍攝將  
作如故確性恭勤雖祁寒暑雨未嘗暫懈

段德操為將軍簡校少府事時已年老而精勤不怠巡

察所部略無休息

韋機為司農少卿受詔簡較東都督營田園苑之事高祖謂之曰兩都是朕東西二宅也今之宮館隋代所造歲序既淹漸將頽頹欲有修造又費財力如何機奏曰臣任司農向已十年前復省費今見貯錢三十萬貫若以供葺理可不勞而就也帝大悅

楊崇禮開元初為太府少卿雖錢帛充牣丈尺間皆躬自省閱時議以為稱職擢拜太府卿加銀青光祿大夫

封弘農郡公每歲勾剝省使常出數百萬貫在職二十年公清如一九十餘授戶部尚書致仕時太平歲久御府財物山積以為經楊卿者無不精好

劉瑗為國子祭酒開元二十八年奏曰狀准故事釋奠之日羣官道俗等皆令赴監觀禮臣請依故事著之

裴武為京兆尹領大司農其間掌錢穀供饋之事皆粗有勞績

裴次元為太府卿奏元和五年上言左藏庫置修屋宇

本錢二百萬從之

文宗太和四年正月秘書省奏請修書閣及廨署屋宇等狀以當司藏書六萬餘卷列官三十一員廨署傾危秘閣摧破久未脩葺漸恐費功伏當陛下文明之朝天下宗聖萬方觀德之日海內崇儒之時今者棟宇欹斜圖籍缺落臣忝職司輒申伏乞特下有司計料修葺使加功力庶得宇全可之

鄭覃為宰相兼國子祭酒開成元年奏請五經博士各

一人緣無祿俸請依王府官例給祿粟從之

後唐聶延祚為少府監明宗天成元年上言牌印舊體不與朱記相參伏自近年亦歸當監鑄造既湏篆字何異印文伏乞下中書釐革

王彥鎔為太僕少卿天成元年上言國家四時祠祀郊廟羣神當時供應羊犢皆是前一月於度支請錢付行市人買雖得供事終匪度程伏惟舊例祀羊犢晉絳慈三州每年供進純白羯羊一百一十口赤黃特犢子四

十頭內一十五頭繭粟二十五頭角握乞下三州每年  
依例供進本處以省錢收市

杜紹光為少府少監天成二年上言當司掌朝服儀仗  
祭器服兵戈已來散失向盡苟非得人難為掌轄臣准  
往例除監一員少監二員外比有丞主簿五署令共一  
十六員近自偽梁廢省只委曹吏主張遂至因循或多  
隱漏乞下中書於先廢官員內量置丞簿置令分主當

局公事



錢傅太常丞天成二年奏當司專典祠祀伏以國城西  
面羣祀各有壇墠近年多被民戶侵耕畜牧騰踐莫知  
處所行事之時於封上芟草有乖誠敬今正方春易行  
止絕者

杜昉為國子博士天成二年八月以國學所設比教胄  
子近為外官多占居止請令止絕

崔協為宰相兼判國子祭酒天成三年八月奏請國子  
監每年祇置監生二百人自後更與諸道相次解送至

十月三十日滿數為定又請頒下諸道州府各置官學  
如有鄉黨備諸文行可舉者錄其事實申殿監司方與  
解送但一身就業不得影庇戶門兼大學書生亦依此  
例不得因此便取公牒輒免本戶差役又每年於二百  
人數內不繫時節有投名者先令學官考試校其學業  
深淺方議收補姓名勅宜依長定二百人其中有藝業  
精博者令准近勅考試及格解送禮部及第後據人數  
却填五年正月國子監又奏當監舊例初補監生有東

修錢兩貫文及第後光學錢一貫文切緣當監諸色舉人及第後近日多不於監司出給光學文抄及不納光學文錢只守選限年滿便赴南曹叅選南曹近年選人並不收置監司光學文抄為憑請自後欲准例應諸色舉人及第後並却於監司出給光學文抄并納光學錢等各有所業次第以備當逐年修葺公使奉勅宜准往例指揮兼自今後凡補監生須令情願住在監中修學則得給牒收補仍據所業次第逐季考試申奏其勘到

見管監生一百七十八人仍勒准此指揮如收補年深未聞藝業虛霑補牒不赴試期亦委監司簡點其姓名年月一一分析申奏長興元年春國子監又請以學生束修及光學錢備監屯修葺公使從之

杜璟為殿中丞天成四年六月上言以本司法物寄於寺觀請量修公署

張殷袞為少府少監長興元年六月奏請斷官賣農器例皆薄怯不便生民

魏迨為大理卿長興元年七月奏諸道刑獄恐有淹滯望令本道判官一人每月兩度彙囚疏理

魏仁鶚為太僕少卿長興二年閏五月奏以本等祠祭牲酒咸非素備請復舊規令諸道進納

晉崔暹判太常卿公事時二舞久廢有詔修舉暹撰樂章新詞教舞童歌之高祖賞馬錫賚甚厚直拜太常卿

恩獎

夫列卿之任所以樹棘木而定位法河海而命職率其

所屬守厥攸司內承於三公外倡於九牧蓋元后之欽  
屬庶尹之表儀也乃有直方自守公忠兼勵寬厚以成  
德貞固而幹事馳老成之譽罄補察之規清白以簡身  
營奉而宣力篤行可尚積勞寔彰繇是被之寵靈異其  
名數至或稱揚著於詔命褒美形於歎息其告老也有  
加等之禮其不幸也極飾終之榮斯所以懋功而勸能  
旌賢而聳善俾百工之咸乂而庶績之惟熙者莫不繇  
是道也

漢周仁為郎中令景帝再自幸其家徙陽陵

朱邑為九卿居處儉節家無餘財宣帝神爵元年卒天

子閔惜下詔稱揚曰大司農邑廉潔守節退食自公亡

疆外之交東修之餽餽與饋同可謂淑人君子遭離凶災甚

閔之賜邑子黃金百斤以奉其祭

蘇武為典屬國宣帝以武著節老臣今朝朔望號稱祭

酒加祭酒之號所以優尊也甚優寵之

金敞為衛尉病甚成帝使使者問所欲以弟岑為託帝

召岑拜為使主客

官名屬鴻臚主胡客也

敞子涉本為左曹帝拜

涉為侍中使侍幸緣車載送衛尉舍

幸緣車常署左右侍召載皇孫今遣

涉歸帝以皇孫車載之寵之也晉漢注

緣車名皇孫車天子有事乘以從也 須史左右

漢鈿期光武時為衛尉疾病使使者存問加賜醫藥甚厚及卒帝親臨襚斂贈以衛尉安成侯印綬

高詡光武時拜大司農在朝以方正稱卒官賜錢及冢田

祭彤為太僕明帝每見彤常歎息以為可屬以重任後



從東巡狩過魯坐孔子講堂顧指子路室謂左右曰此

太僕之室太僕吾之禦侮也

孔子曰吾有四友馬自吾得回也門人加親是非胥

附耶自吾得賜也遠方之士日至是非奔走耶自吾得師也前有光後有輝是非先後耶自吾得由惡言不至

是非禦侮耶

趙孝為衛尉弟禮為御史中丞明帝嘉其兄弟篤行欲寵異之詔禮十日一就衛尉府大官送供俱令其相對盡歡數年禮卒帝令孝從官屬送歸葬後歲餘孝復以衛尉賜告歸卒于家

召馴章帝時為光祿勳卒於官賜冢塋陪園陵

韋彪為長樂衛尉數陳政術每歸寬厚比上䟽乞骸骨  
拜為奉車都尉秩中二千石賞賜恩寵侔於親戚章帝  
建初七年車駕西巡彪行太常事帝問以三輔舊事禮  
儀風俗乃厚賜彪錢珍羞食物使歸平陵上冢還拜大  
鴻臚元和二年春東巡狩以彪行司徒事從行還以病  
乞身帝遣小黃門太醫問疾賜以食物彪遂稱困篤章  
和二年夏使謁者策詔曰彪以將相之裔勤身飾行出

自州里在位歷載中被篤疾連上求退君年在耆艾不可復以加增恐職事煩碎重有損焉其上大鴻臚印綬遣子太子舍人詣中藏府受賜錢二十萬和帝永元元年卒詔尚書故大鴻臚韋彪在位無愆方欲錄用奄忽而卒其賜錢二十萬布百疋穀三千斛

耿秉和帝時為光祿勳卒賜以朱棺玉衣將作大匠穿冢假鼓吹五營騎士三百餘人送葬

楊賜靈帝時為太常詔賜御府衣一襲自所服冠幘綬

玉壺革帶金錯鈎佩

金錯以金間錯其文

魏袁渙字耀卿為郎中令卒官太祖為之流涕賜穀二千斛一教以太倉穀千斛賜郎中令之家一教以垣下穀千斛與耀卿家外不解其意教曰以太倉穀者官法也以垣下穀者親舊也

程昱為衛尉文帝踐祚方欲以為公會薨帝為流涕追贈車騎將軍諡曰肅侯

和洽為太常清貧守約明帝聞之加賜穀

辛毗明帝時為衛尉與徐邈胡質皆以憂國忘私不營產業賜穀二千斛錢三十萬告天下

吳劉基為大司農孫權大暑時嘗於船中宴飲於船樓上值雷雨權以蓋自覆基餘人不得也其見待如此

晉周浚武帝時三為少府以本官領將作大匠改營宗廟訖增邑五百戶

華表武帝時為太常卿數歲以老病乞骸骨詔曰表清真履素有老成之美久幹王事靜恭匪懈而以病固辭

章表懇至今聽如所上以為大中大夫賜錢二萬牀帳  
褥蓆祿賜與卿同仍門施行焉

賀循元帝時為太常兼常侍如故循以九卿舊不加官  
今又疾患不宜兼處此職惟拜太常而已帝以循為清  
貧下令曰循冰清玉潔行為俗表位處上卿而居身服  
物蓋周形而已屋室財庇風雨孤近造其廬以為慨然  
其賜六尺牀薦蓆褥并錢二十萬以表至德暢孤意焉  
循又讓不許不得已留之初不服用又為太子太傅太

常如故循自以抗疾廢頓臣節不修上隆降尊之義下  
替交叙之敬懼非垂典之教也累表固讓帝以循體德  
率物有不言之益敦勵備至期於不許命皇太子親往  
拜焉循有羸疾而恭於接對詔斷賓客其崇遇如此

薛廉明帝時為太常賜安卿侯詔曰廉履德冲素盡忠恪已  
方賴德訓宏濟政道不幸殂殞痛于厥心今遣持節侍  
御史贈左光祿大夫開府儀同三司魂而有靈加茲榮  
寵及葬屬王敦作逆朝廷多故不得議諡直遣使者祭

以太宰

王彬成帝時為度支尚書蘇浚平後改築新宮彬為大匠以營創勲勞賜爵關內侯

南齊蕭穎胄為衛尉高宗廢立以穎胄預功建武二年賜穎胄以常所乘白犢牛

梁顧協為鴻臚大同八年卒高祖悼惜之手詔曰貞外散騎常侍鴻臚卿兼中書通事舍人顧協廉潔清白居然不衰久在省闈內外稱善奄然殞喪惻怛之懷不能



已已傍無近親彌足哀者大斂既畢即送其喪柩還鄉并營冢擲近皆資給悉使周辦可增散騎常侍令使舉哀

裴子野為鴻臚卿卒高祖悼惜為之流涕詔曰鴻臚卿領步兵校尉知著作郎兼中書通事舍人裴子野文史足用廉白自居劬勞通事多歷年所奄致喪逝惻愴于懷可贈散騎常侍贈錢五萬布五千疋即日舉哀諡曰

貞子

後魏堯暄為大司農卿孝文太和十九年卒於平城帝為之舉哀贈安北將軍相州刺史贈帛七百疋

成淹除羽林監領主客令加威遠將軍于時宮殿初措經始務廣兵民運財日有萬計伊碓流澌苦於厲涉淹遂啟求勅都水造浮航孝文賞納之意欲榮淹於衆朔旦受期百官在位乃賜帛百疋知左右二都水事

北齊崔暹為太常卿文宣帝謂羣臣曰崔太常清正天下無雙卿等不及

後周趙肅魏大統十三年除廷尉少卿明年元日當行朝禮非有封爵不得預焉肅時未有茅土不入左僕射長孫儉言之文帝乃召肅謂曰歲初行禮豈得使卿不預然何為不早言也於是令肅自選封名肅曰清河縣乃太平之應竊所願也於是封清河縣子邑懷遠百戶隋趙綽高祖時為大理少卿處法平允帝以綽有誠直之心每引入閣中或遇帝與皇后同榻即呼綽坐評論得失前後賞賜萬計其後進位開府贈其父為蔡州刺

史時河東薛胄為大理卿俱名平恕然胄斷獄以情而  
綽守法俱為稱職帝每謂綽曰朕於卿無愛惜但卿骨  
相不當貴顯仁壽中卒官帝為之流涕中使弔祭焉鴻  
臚監護喪事

唐竇誕太宗時為殿中監進封莘國公以修營太廟賜  
物五百段

段綸為宗正卿卒太宗甚傷悼為不視朝將出臨之太  
常奏帝祭致齊不得哭而止

楊師道為太常卿貞觀二十一年卒贈吏部尚書并州都督陪葬昭陵賜東園秘器并為立碑

柳亨為光祿少卿貞觀二十三年以修太廟功加金紫光祿大夫

李弼高宗時為衛尉卿上元元年九月帝御含元殿東翔鸞閣觀大酺是日弼暴卒於宴所帝為之廢酺一日贈工部尚書

李琬為幽州刺史宗正卿代宗大歷六年賜琬雜綵一

百疋衣一襲以其職奉陵寢績用可稱褒之

白琇珪為司農少卿遷大卿在卿曹十餘年德宗以為  
可任腹心遂引為神策軍使兼御史大夫賜名志貞

白居易為秘書監因中謝日賜金紫



冊府元龜卷六百二十

欽定四庫全書

子部  
冊府元龜卷六百二十一

詳校官中書臣朱文翰

侍讀臣孫球覆勘

總校官庶吉士臣何思鈞

校對官中書臣范來宗

謄錄監生臣周丕



欽定四庫全書

冊府元龜卷六百二十一

宋 王欽若等 撰

卿監部

司宗

司賓

監牧

司宗

周禮小宗伯之職掌三族之別以辨親疏漢懲秦失大封子弟受命宗臣以主屬籍所以厚親親而重國本也典午之後頗有沿革而職司帝緒未嘗廢闕蓋將以董

正昭穆糾綏宗族達孝悌之道固盤維之本俾夫嫡庶  
區分尊卑定位齒序斯著內朝有光韡韡棣華得和樂  
之譽振振公姓彰仁厚之風傳曰周之宗盟異姓為後  
詩云文王孫子本支百世非邑司有典名簿克舉則何  
以惇叙九族臨照百官者乎

漢劉郢客楚元王之子高后以為宗正封下邳侯

平陸侯禮楚元王子也景帝元年為宗正

德侯劉通景帝三年為宗正

沈猷侯受為宗正坐聽請不具宗室耐為司寇

受為宗正人有

私請求者受聽許之故於宗室之中事有不具而受獲罪

劉辟疆楚元王之孫休侯富之子清靜少欲嘗以書自娛不肯仕昭帝即位霍光擇宗室子可用者辟疆子德待詔丞相府年二十餘欲用之或言父見在亦先帝之所寵也遂拜光祿大夫守長樂衛尉時年已八十徙為宗正數月卒

劉德昭帝初為宗正丞雜治劉澤詔獄父為宗正徙為

大鴻臚丞遷大中大夫後復為宗正雜案上官氏蓋主  
事妻死大將軍光欲以女妻之德不敢取蓋長公主孫  
譚遮德自言德數責以公主起居無狀侍御史以為光  
望不受女望怨也承指劾德誹謗詔獄免為庶人光聞而  
恨之以侍御史不知已意復白召德守青州刺史歲餘復為宗正  
與立宣帝賜爵關內侯孫慶忌復為宗正

劉向本名更生宣帝時累遷散騎諫大夫給事中元帝  
初即位太傅蕭望之為前將軍少傅周堪為諸史光祿

大夫皆領尚書事甚見尊任更生年少於望之堪然二人重之薦更生宗室忠直明經有行擢為散騎宗正給事中

後漢劉般遷宗正在朝廷竭忠盡節勤勤憂國夙夜不怠數納嘉謀

劉平以仁孝著為宗正

劉軫建初中稍遷宗正卒官遂世掌宗正焉

劉虞為尚書令光祿勳以宗族有禮更為宗正

晉扶風王亮為衛將軍武帝咸寧三年詔曰宗室戚屬國之枝葉欲令奉率德義為天下式然處富貴而能慎行者寡召穆公糾合兄弟而賦棠棣之詩此姬氏所以本枝百世也亮為宗師所當施行皆咨之於師時宗室殷盛無相統攝乃以亮為宗師使訓導觀察有不遵禮法小者正以義方大者隨事聞奏

山濤為吏部啓云羊祜忠篤厚寬然不長理劇宗正卿缺不審可轉作否

朱整泰始二年以侍中中書監為宗正卿

王覽咸寧元年以大中大夫為宗正卿

陳南康愍王曇朗子方慶少清警涉獵書傳及長有幹  
略天嘉中封臨汝縣侯尋為給事中太子洗馬權兼宗  
正卿

秦明王翰孫纂太武封為中山王纂於宗屬最長宗室  
有事咸就諮焉

封琳為司宗下大夫有長者之稱

彭城王勰獻文之子孝文為家人書於勰曰風教密微禮政嚴嚴若不深心日勸何以敬諸每欲立一宗師肅我元族汝親則宸極位乃中監風標才器實足師範屢有口勅仍執冲遜難違清挹荏苒至今宗制之重舍汝誰寄便委以宗儀責成汝躬有不遵教典隨事以聞吾肅治之若宗室有憊隱而不舉鍾罰汝躬綱維相厲庶有觀政吾朝聞夕逝不為恨也勰翼日面陳曰奉詔令專主宗制糾舉非違臣聞其身正不令而行其身不正



雖令不從臣處宗乏長幼之順接物無國士之禮每因  
啓請已蒙哀惜不謂令詔終不矜免猶願聖慈垂賜蠲  
遂孝文曰汝諧往欽哉

饒陽男遙大功昆弟皆是景穆之孫至孝明而本服絕  
故除遙等屬籍遙表曰竊聞聖人所以南面而聽天下  
其不可得變革者則親也尊也四世而總服窮五世而  
袒免六世而親屬竭矣去茲以往猶繫之以姓而弗別  
綴之以食而弗殊又律云議親者非唯當世之屬親歷

謂先帝之五世謂尋斯旨將以廣帝宗重盤石先皇所以變茲事條陳此別制者太和之季方有意於吳蜀經始之費慮深在初割減之起暫出當時也且臨淮地分屬籍之始高祖賜帛三千疋所以重分離樂良王長命亦賜練三千疋所以存慈暵此皆先朝慙懃念不得已而然者也古人有言百足之蟲雖死不僵亦以其輔已者衆臣誠不欲妄親大階苟求潤屋但傷大宗一分則天子屬籍不過十數人而已在漢諸王之子不限多

少皆列土而封謂之曰侯至於魏晉莫不廣祚河山稱之曰公者蓋惡其大宗之不固骨肉之恩疎矣臣去皇上雖五世之遠於先帝便是天子之孫高祖所以國頒祿賦復給衣食后族唯給其賦不與衣食者欲以別外內限異同也今諸廟之感在心未忘行道之悲倏然已及其諸封者身亡之日三年服終然後改奪今朝廷猶在遏密之中便議此事實用未安詔付尚書博議以聞尚書令任城王澄尚書僕射元暉奏同遙表靈太后不

從

後周宇文測為太祖丞相府右長史太祖令測詳定宗室昭穆遠近附於屬籍除通直散騎常侍黃門侍郎

鮑宏武帝勅宏脩皇室譜一部分為帝緒疎屬賜姓三篇

唐高祖武德元年十月二十四日詔太僕少卿安康郡公襲譽我之同姓派別枝分惟厥祖考世敦恭睦特聽合譜宗正恩禮之差同諸服屬

十二月六日又詔義安郡王李孝常屬籍宗正寺

二年二月詔曰朕受終揖讓君臨四海普天之下同加  
惠澤宗緒之情義越常品宜有旌異以明等級諸宗姓  
官宜在同列之上未有職任者不在徭役之限每州置  
宗師一人以相管攝別為團伍所司明立條式

高宗永徽二年九月二十一日召宗正卿李博文問曰  
比聞諸親何以得有除屬者對曰以屬踈降盡故除摠  
三百餘人帝曰朕追遠之感實切於懷諸親服屬雖踈

理不可降並宜依舊編入屬籍

睿宗景雲二年四月以秘書監薛王隆業為宗正卿  
宗開元十三年四月詔嗣王有傍繼者並宜摠停

二十年七月七日詔宗正寺官員以宗子為之

二十二年七月勅曰諸贈太子須年官為主廟並致享  
祀雖禮欲歸厚而情實未安蒸嘗之時子孫不預若專  
令官祭是以疎間親遂此為常豈云教孝其諸贈太子  
有後者但官置廟各令子孫自主祭其署及官悉停若

無後者宜依舊

二十五年秋七月乙卯勅諸陵廟並隸宗正寺其官員悉以宗子為之

濮陽郡王徽為宗正卿頗承恩奏請宗正奉陵廟

李揆開元末拜右拾遺改右補闕起居郎並知宗子表疏

天寶元年七月詔曰古之宗盟異姓為後王者設教莫貴其親殿中侍御史李彥允等奏稱與朕同承梁武昭

王後請甄叙者源流寔同譜牒猶著雖子孫千億各散於四方而本枝百代何殊於近屬况有陳請所宜敦敘自今以後梁武昭王孫寶已下絳郡姑臧燉煌武陽等四房子孫並宜隸入宗正編諸屬籍以明尊本之道用廣親親之化

五載二月十二日勅九廟子孫並宜叙入五等親永為常式

張均為駙馬都太常卿又以承恩太常復奉陵廟自後



宗正太常奉者數四

代宗永泰二年十月宗正卿吳王祇奏上皇室永嘉新譜二十卷太常博士柳房撰也房精於譜學按宗正譜牒自武德以來宗支昭穆相承撰皇室譜二十卷

大曆二年八月勅宗正寺復奉陵廟

穆宗長慶元年三月宗正寺奏准貞元二十一年勅宗子陪位放五百七十人出身今年勅放三百人伏緣人數至多不霑恩澤白身之輩將老村閭乞降特恩更放

二百人出身許之

文宗太和元年四月宗正寺奏今年二月十三日應赴御樓陪位宗子前資見任及嘗選未出身宗子據狀共三千二百八十九人前件陪位宗子等准赦書節文仍據始封每王後與一人出身委宗正卿詳圖譜取一房最沈翳者充數具名聞奏者伏以所赴陪位宗子緣遇參選時遠方臻集并京畿之內人數至多若據赦書節文所放全少始封王後止有四十八房今請條疏從長

慶元年四年寶歷元年三度遇恩並未霑及者伏請准  
寶歷元年正月七日赦書節文每户下放一人出身其  
從寶歷元年已前三度受恩已曾放出身檢勘三代名  
同者並不在此限伏冀沈翳適霑恩澤遠房孤弱盡獲  
出身制可

開成元年閏六月乙未召宗正卿李弘澤問圖譜弘澤  
對以自肅宗已來並未修續臣已請追林贊鄭覃與李  
固言林贊實有氏族學時論以為不公癸卯勅追沔王

府長史分司東都林贊同修七聖玉牒從宗正寺之請也

二年六月癸巳朔宗正寺奏諸府州如有宗子寄寓貧病不能自濟者有羈旅道途棲遲丐食者並請所在州縣切加存卹兼隨事接借不得令有侵欺致使抑屈如有違犯禮禁自冒刑名即任所在州縣子細勘問仍先具罪狀申報宗正寺待寺司聞奏不得懸便科斷所冀遠方宗子平時無困辱之虞守土諸侯聖朝識敦睦之

意伏以事關國體臣忝職司詔今宗正寺散牒所在搜訪宗室無官官貧無交不支濟者指實具名聞奏

四年閏正月翰林學士柳璟奏今月十二日面奉進止以臣先祖所撰皇宗永泰新譜事頗精詳令臣自德宗皇帝陛下御極已來依舊式修續伏請宣付宰臣詔宜令宗正寺差圖譜官與柳璟計會修撰仍令戶部量供紙筆璟續成十卷以附前譜

梁太祖開平五年三月宗正卿朱遜圖譜官朱損之進

所撰述天潢源派二軸各賜帛

後唐明宗天成元年十月宗正卿李紆奏三京畿縣有陵園處每縣請都置陵臺令一員翼專局分免有曠遺二年七月宗正少卿李莒請修恭陵和陵

長興三年七月宗正寺奏今年經大雨太廟正殿踈漏門樓墊陷宮墻及神門伏舍並皆缺漏請下所司修補司天以墓年不宜興造請隨缺壞處量事增脩從之

末帝清泰二年正月宗正寺奏北京應州曹州諸陵望

差本州府長官朝拜雍坤和徽四帝差太常宗正卿朝  
拜從之

晉高祖天福二年六月壬午朔宗正卿石光贊奏昔周  
武王奄有天下過商容之間必式見比干之墓即封蓋  
褒賞賢良尊崇忠義伏惟皇帝陛下顯膺天命開創洪  
圖解網行仁救時順動樂業不知於帝力悅隨但聽於  
山呼盛德難名太平可待臣伏見滎陽道左石君廟本  
前大中大夫石奮之廟奮有子四人各二千石祿漢高

祖曰人臣尊寵畢集其門故號萬石君德行懿純備列  
前書唐大中十三年鄭州司馬石貫稱裔孫刊石廟庭  
備紀其事伏遇皇帝行幸浚郊經過滎水展義已聞於  
岐路覃恩宣布於幽明其萬石君廟伏乞俯弘霈澤特  
賜崇封俾光遠祖之徽猷益茂我朝之盛典有旨待續

施行

石光贊為太子賓客光贊少為儒飽於遊宦後唐時歷諸藩從事晉高祖即位自滑州節度判官擢

為宗正卿少時嘗有占者云子晚歲當因姓氏為美官果如其言晉氏本出迴鶻來自金山府明矣如後魏後周奄有天下非以生於中土則為貴焉始見太常禮官定石慶為始祖又光贊嘗以史傳苗裔纂成玉牒編次



以獻高祖其間有晉魏已前官  
至拾遺補闕者聞者知其寡學

### 司賓

孔子云束帶立於朝可使與賓客言也其司賓之謂乎  
故三代之禮周制彌文官居其方政乃用又大則有行  
人之職次則有掌客之名咸領於秋卿動繫於國體朝  
聘會同之事莫不由之餼獻飲食之數於是乎在至若  
優禮二王之後懷來四夷之長其儀式序著之於籍漢  
氏以降益重其選屬於委任靡限他官用能勞徠殊鄰

交好與國升降揖讓而有度尊迎接對以咸宜固有才  
識兼明辭令嘉淑風鑒標舉器用博達能稱厥職有聲  
於時焉者

漢韓昌為車騎都尉甘露二年呼韓單于款五原塞

款回

也願朝三年正月

會正旦之朝賀也

遣昌迎之單于就邸留月

餘遣歸國又遣昌與長樂衛尉高昌侯董忠送出朔方

雞鹿塞

在朔方窳潭縣北

南齊宗史為臨川王常侍武帝與魏和親勅史與尚書

殿中郎任昉同接魏使皆時選也

王融為中書郎武帝以其才辨使兼主客接魏使房景高宋弁并見融年少問主客年幾融曰五十之年久逾其半

張融為從事中郎將魏聞融名武帝使融接北使李道固就席道固顧而言之曰張融是宋彭城長史張暢子不融嘖感久之曰先君不幸名達六夷

劉繪為中書永明末魏使來繪以辭辨勅接魏使事畢

當撰辭繪謂人曰無論潤色未易但得我語亦難矣

臣

若等曰繪與魏使李彪問答甚多事具奉事敏辨門

梁范岫仕齊為國子博士永明中魏使至有詔妙選朝士有辭辯者接使於界首以岫兼淮陰長史迎焉

蕭撝為太子中舍人東魏遣李諧盧元明使於梁武帝以撝辭令可觀令兼中書侍郎受幣於東賓館

危脣為太學博士有口辯大同中嘗兼主客郎對接北使魏使李諧問脣曰主客在郎官幾時答曰我本訓曹

虎門適後今任諧言國子博士不應左轉為郎胥曰特為應接遠賓故權兼耳諧言屈已濟務誠得事宜繇我一介行人令卿左轉胥荅曰自顧菲薄不足對揚盛美豈敢言屈

傅岐為鎮南諮議參軍兼中書通事舍人美容止博涉能占對大同中與魏和親其使歲中再至常遣岐接對馬

後魏裴駿為中書侍郎宋武帝遣使明僧暲朝貢以駿

有才學乃假給事中散騎常侍於境上勞接

李安世獻文時為主客令齊使劉纘朝貢安世奉詔勞之安世美容貌善舉止纘等自相謂曰不有君子其能國乎纘等呼安世曰三代不共禮五帝各異樂安足以亡秦之官稱於上國纘曰世異之號凡有幾也安世曰周謂掌客秦改典客漢名鴻臚今日主客君等不欲影響文武而殷勤亡秦纘又指方山曰此山去燕然遠近安世曰亦繇石頭之於番禺耳國家有江南使至多出

藏內珍物令都下富室好容服者貸之今使任情交易使至金玉肆問價纘曰北方金玉大賤當是山川所出安世曰聖朝不貴金玉以同瓦礫又皇上德通神明山不愛寶故無川無金無山無玉纘初將大市得世言慚而罷

劉芳窮窘篤學有志行會齊使劉纘至芳之始族兄也擢芳兼主客郎與纘相接尋拜中書博士

甄琛孝文時兼主客郎迎送齊使彭城劉纘琛欽其器

貌嘗歎咏之

成淹為著作郎齊遣其散騎常侍裴昭明散騎侍郎謝  
竣等來弔文明太后喪欲以朝服行事主客報之云弔  
有常式何得以朱衣入凶庭昭明等言本奉朝命不容  
改易如此者數四執志不移孝文勅尚書李冲令選一  
學識者更與論執冲奏遣淹時昭明言未解魏朝不聽  
朝服行禮義出何典淹言吉凶不同禮有成數玄冠不  
弔童孺共聞昔季孫將行請遭喪之禮千載之下猶共



稱之卿遠自江南奉慰不能式遵成事方謂義出何典  
行人得失何其異哉昭明言二國交和既久南北皆須  
准望齊喪高帝魏遣李彪通弔於時初不素服齊朝亦  
不以為疑那得苦見要逼淹言彪通弔之日朝命以弔  
服自隨而彼不遵高宗追遠之慕乃踰月即吉彪行弔  
之時齊之君臣皆以鳴玉盈庭貂璫曜目百僚內外朱  
服煥然彪行人不被主人之命復何容獨以素服間衣  
冠之中來責雖高未敢聞命我皇帝仁厚之性侔於有

虞處諒闇以來百官聽於冢宰卿豈得以此方彼也昭明乃搖膝而言三皇不同禮亦安知得失所歸淹言若如來談卿以虞舜高宗為非也昭明遂相顧而笑曰非孝者宣尼有成責行人亦弗敢言希主人裁以弔服使人惟齋袴褶此既戎服不可以弔遂緇衣幅以申命令為魏朝所逼違負指授還南之日必得罪本朝淹言彼有君子也卿將命折中還南之日應有高賞若無君子也但以有光國之譽雖復非禮見罪亦復何嫌南史董

狐自當直筆既而帝遣李冲問淹昭明所言淹以狀對  
帝詔冲曰我所用人勅仍送衣帽給昭明等賜淹果  
食明旦引昭明等入皆令文武盡哀淹後為侍郎南齊  
遣其散騎常侍庾革散騎侍郎何憲主書邢宗慶朝貢  
值朝廷有事明堂因登靈臺以觀雲物帝勅淹引革等  
館南矚望行禮事畢還外次館賜酒食宗慶語淹言南  
北連和既久而比棄信絕好為利而動豈是大國善鄰  
之義淹言夫為王者不拘小節中原有菽工採者獲多

豈得眷眷守尾生之信且齊先王歷事宋朝荷恩積世當應便爾欺奪宗慶庾革及何皆相顧失色何憲知淹昔從南入以手掩目曰卿何為不作于禁而作魯肅淹言我捨危效順欲追蹤陳韓何于禁之有憲亦不對

崔景俊歷侍御史主文中散受勅接齊使蕭琛范雲

李憲字仲軌清粹善風儀好學有器度為孝文所賞稍遷散騎侍郎接對齊使蕭琛范雲

薛麟駒好讀書舉秀才除中書博士太和九年齊使至

乃詔麟駒兼主客郎以接之

李系少聰慧有才學為中散大夫梁武遣使朝貢侍中  
李神雋舉系為尚書南主客郎系前後接對凡十八人  
頗為稱職

劉隲為中書舍人時與梁和通隲前後受勅接對其使  
十六人

孟威孝明時為直閣將軍沃野鎮將正光初蠕蠕主阿  
那瓌歸國詔遣前郢州刺史陸希道兼侍郎為使主以

威兼散騎常侍為副遠畿迎接阿那瓌之還國也復以威為北將軍光祿大夫假員外常侍為使主護送之

東魏李諧為中書侍郎天下平時南北通好務以俊乂相矜銜命接客必盡一時之選無才地者不得與焉梁使陸晏來聘諧郊勞過朝歌晏曰殷之頑民正在此諧曰永嘉南遷盡歸江東

北齊魏收初仕後魏為散騎常侍兼著作郎勅兼主客接梁使謝珽徐陵

祖孝徵弟孝隱有文學早知名詞章雖不逮兄亦機警  
有口辯兼解音律魏末為散騎常侍迎梁使時徐君房  
庾信來聘名譽甚高魏朝聞而重之接對者多取一時  
之秀盧元景之徒並降階攝職更遞司賓孝隱少處其  
中物議稱美

薛琚字曇珍形貌魁偉少以幹用稱為典客令每引客  
見儀望甚美魏帝召而謂之曰卿風度峻整姿貌秀異  
後當升進以處何官琚曰宗廟之禮不敢不敬朝廷之

事不敢不忠自此以外非庸臣所及

裴讓之為太原公記室梁使至嘗令讓之攝主客郎

元景安東魏天平末世宗入廟景安隨從在鄴于時江南款附朝貢相尋景安妙閑馳騁有容則每梁使至嘗令與斛律光皮景和等對客騎射見者稱善

崔瑜之為揚州平東長史帶南梁太守梁義州刺史文僧明來降瑜之接迎有勲賜爵高邑男

皮景和天統中為侍史後周通好之後冠蓋往來常令



景和接對每與使人同射百發百中甚見推重

李諤字士恢好學解屬文為中書舍人有口辯每接對  
陳使

郎茂為司空府參軍會陳使傅綜來聘令茂接對之  
陸彥師為通直散騎常侍每陳使至必高選主客彥師所  
接對者前後六輩

後周柳弘為御正上士陳遣王偃民來聘高祖令弘勞  
之偃民謂弘曰來日至於藍田正逢滋水暴長所齋國

信溺而從流今所進者假之從史請勒下流為追尋此物也弘曰昔淳于之獻空籠前史稱以為美足下假物而進詎是陳君之命乎偃民慚不能對高祖聞而嘉之盡以偃民所進之物賜弘仍令報聘占對詳敏見稱於時

隋柳肅開皇初為太子洗馬閑於占對陳使謝泉來聘以才學見稱詔肅宴接時論稱其華辯

辛公義為主客郎中每陳使來朝嘗奉宴接

陸爽為太子洗馬博學有口辯陳人至境帝令迎勞之  
柳謩之歷兵部司勳二侍郎朝廷以雅望善談諺又飲  
酒至一石不亂絲是每陳使至輒令接對遷光祿少卿  
史祥大業初為鴻臚卿時突厥啓民可汗請朝煬帝遣  
祥迎接之

閻毘為殿內丞從幸張掖郡高昌王朝於行所詔毘持  
節迎遂將護入東都

蘇夔為尚書職方郎燕王司馬時煬帝方勤遠略蠻夷

來朝帝問宇文述虞世基曰西夷率服觀禮華夏鴻臚  
之職須歸令望寧有多才藝美容儀可接賓客者為之  
乎咸以夔對即日拜鴻臚少卿其年

大業五年

高昌王麴伯

雅來朝朝廷妻以公主夔有雅望令主婚

裴矩大業末為虎賁郎將從煬帝至東都屬射匱可汗  
遣其猶子率西番諸胡朝貢詔矩對接之

唐陳大德為職方郎中貞觀十四年高麗長子桓權來  
朝遣大德迎勞於柳城

監牧

周官校人掌王馬之政其屬有牧師圉師趣馬巫馬及  
庾人之職所以授地教養簡節攻疾然後十有二閑之  
政成矣施及列國亦脩馬政秦氏之霸并吞六國六萬  
騎之馬盡歸之焉漢承秦制亦重太僕之任乃有三令  
五監邊郡六牧諸苑三十六所馬牛雜畜充牣其間應  
乾之策何啻百倍凡大祀戎事軍國所須皆取足焉歷  
代已來數之耗登署之廢置或申侵蹂之禁或下辜權

之令隨時立制可以悉數然則牧于坵野蓋避於民居  
齊其飲食不違於物性詩禮所載可不務乎

周孝王時非子居大丘

今槐里也

好馬及畜善養息之大丘

人言之周孝王孝王召使主馬于汧渭之間馬大蕃息  
孝王欲以為大駱適嗣申侯之女為大駱妻生子成為  
適申侯乃言孝王曰昔我生酈山之女為戎胥軒妻生  
中湑以親故歸周保西垂西垂以其故和睦今我復與  
大駱妻生適子成申駱重婚西戎皆服所以為王王其

圖之於是孝王曰昔伯翳為舜生畜畜多息故有土賜

姓嬴今其後世亦為朕息馬朕其分土為附庸邑之秦

今天水隴西縣秦亭也

使復續嬴氏祀號曰秦嬴亦不廢申侯之

女子為駱適者以和西戎

宣王以厲王之時牧人之職廢宣王始興而復之故有

考牧之詩

魯莊公二十九年春新延廡延廡者法廡也

周禮天子十有二闕

馬六種邦國六闕馬四種每廡一闕言法廡者六闕之舊制也

僖公牧于坰野魯人尊之於是季孫行父請命于周而

史克作頌曰駟駟牡馬在坰之野

駟駟良馬腹幹肥也坰晉野也牧於坰

野避民居與良田也

薄言坰者有駟有皇有驪有黃以車彭彭牧之

坰野則駟駟然驪馬白跨曰駟黃白曰皇純黑曰驪黃駢曰黃諸侯六閑馬四種有貌馬有戎馬有田馬有駕

馬彭彭有力有容也

秦始皇八年馬東就食

漢景帝時始造苑馬以廣用

苑馬謂為苑以牧馬

武帝元狩四年大將軍衛青驃騎將軍霍去病兩軍之



出塞塞閱官及私馬凡十四萬匹而後入塞者不滿三萬匹自青園單于後十四歲而卒並不復擊匈奴者以漢馬少也

五年天下馬少平壯馬二十萬匹

貴平壯馬賈欲使人競畜馬

御史

大夫衛綰奏馬高五尺九寸已上齒未平

馬十歲齒下平

不得

出關初武帝為伐胡故盛養馬馬之往來食長安者數萬匹卒掌者關中不足廼調旁近郡又以車騎馬乏縣官錢少買馬難得廼著令封君已下至三百石吏以

上差出壯馬天下亭亭有畜字馬歲課息

太初元年更名家馬為捫

徒孔切

馬初置路軫

音零

先是太

僕掌輿馬官有大廐未央家馬三令

家馬者主供天子私用非供大祀戎

事君國所須故謂之家馬也

又有車府路軫騎馬駿馬四令又有寵

馬閑駒橐泉駒駘承華五監長

橐泉廐在橐泉宮下閑闕養馬之所故曰閑駒

駒駘出北海中其狀如馬駒音徒高切駘音塗

又有邊郡六牧師苑令

漢書北海郡靈

州縣有河奇苑號非苑歸縣有堵苑白馬苑都郵縣有牧師苑西河郡鴻門有天封苑東郡襄平有牧師官漢

官儀云牧師諸苑三十六所分置北邊西邊分養馬二十萬頭

又有牧橐昆䟽令

牧橐言牧

養索佗也昆獸名也跡蹠者謂其跡下平也蹠音跡

昭帝始元五年罷天下亭母馬及馬弩闕

武帝數伐匈奴再擊大宛

馬死畧盡乃令天下諸亭養母馬欲令其繁孳又作馬上弩機官令悉罷之舊馬高五尺六寸齒未平弩十石已上皆不得出闕今不禁也

後漢和帝永元五年二月戊戌詔有司省減內外廡及涼州諸苑馬

安帝永初二年正月庚申詔越雋置長利高望始昌三苑又令益州郡置萬歲苑犍為置漢平苑

犍為郡名故夜郎國也故

城在今眉州隆  
山縣西北也

順帝漢安元年七月初置承華廄

時以遠近獻馬衆多  
園廄充滿始置承華

令六  
百戶

靈帝光和四年正月初置駮廄丞領受郡國調馬豪右

辜擁馬一匹至二百萬

辜障也擁專也謂障餘  
人賣買而自取其利

中平元年十一月詔廄馬非郊祭之用悉出給軍

後魏太武平統萬定秦隴以河西水草善乃以為牧地  
畜產滋息馬至二百餘萬匹橐駝半之牛羊無數孝文

即位之後復以河陽為牧場常置戎馬十萬匹以擬京師軍警之備每歲自河西從牧於并州以漸南轉欲其習水土而無死傷也而河西之牧彌滋矣

太延二年十一月行幸稠陽驅野馬於雲中置野馬苑獻文帝時呂文祖以勲臣子補龍牧曹奏事中散以牧產不滋坐徙於武川鎮

孝文帝時李堅為太僕卿檢課牧產多有滋息其後宇文福為都牧給事時遷雒勅福檢行牧馬之所福規石

濟以西河內以東拒黃河南北千里牧地事尋施行今之馬場是也及徙代移雜畜於牧所福善於將養並無損耗孝文嘉之尋補司衛監

宣武帝正始四年十一月禁河南牧馬自碣石至于劔閣東西七千里置二十二都延昌元年六月通河南牧馬之禁

隋高祖開皇中以駕部侍郎辛公義向檢諸馬牧所獲十餘萬匹高祖喜曰惟我公義奉國罄心

煬帝大業五年七月置馬牧於青海渚中以求龍種無效而止

唐太宗貞觀十五年以尚乘奉御張萬歲為太僕少卿勾當群牧

二十三年以廐馬糜費留三千匹餘並送隴右

高宗麟德三年以太僕少卿鮮于正俗簡較隴右羣牧

監張說為隴右羣牧使頌序云大唐承周隋離亂之後貞觀初僅得牝壯三十從赤葦澤徙隴右始命太僕

卿張萬歲葦其政馬至麟德中四十年至七十萬六千匹置八使以董之設四十八監以葦之跨隴右金城平

涼天水四郡之地幅員千里猶為狹隘更析八監布於河曲豐曠之地乃能容之於斯之時天下以下繚易一馬及張氏中廢二十年間所殘益寡唐會要云張萬歲三代典羣牧恩信行於隴右故隴右之人以馬歲為齒為張氏家諱之也

上元元年以右衛中郎將丘義檢校隴右羣牧監

儀鳳三年十月以太僕少卿李思文檢校隴右諸牧監

使自此始有使號其後蘇幹夏侯亮楊道昕張仁德張思兼宗元爽周履冰魏元忠李道廣賀蘭爽姚元之宗楚容宋王成器相次為之

永隆二年七月夏州羣牧使安元壽等奏從調露元年



九月已後至二年五月已前死失馬一十八萬四千九百匹牛一萬一千六百頭

玄宗先天中以鴻臚少卿朔方軍副大總管兼安北都

護王駿為太僕少卿隴右羣牧使

其後王毛仲席楚珍薄承祧韋衢章仇兼

瓊王鉞安祿山王鳳唐欽呂崇貴李輔國彭禮盈樂子昂皆為之

開元二年九月太常少卿姜晦上封請以空名告身於六胡州市馬率三十匹馬酬一游擊將軍時廢馬尚少深以為然遂命齋告身三百道徃市馬

三年四月勅諸牧監官有關交要者委本使簡擇明閑  
牧養者奏付選司勘責補擬如非其材所繇科貶經負  
犯者不在奏補之限牧使有關亦委使司差補申牒所  
繇如不足並申省司速訪補擬

七年三月詔曰調斂惡繁差科在簡每思重人賤畜之  
政輕徭薄賦之宜廢馬略配於諸軍課駒摠留於畜牧  
則應稅之草不假循前今年所支已減舊數可於此數  
內更三分減一

九年正月詔如聞天下有馬之家州縣或因郵遞軍旅  
即先差遣帖助兼定戶之次緣被此百姓嫌疑多不養  
畜遂令騎射之士頓減曩時益國富人何繇可致自今  
已後諸州百姓不問有蔭無蔭若能每家畜馬十匹已  
上緣帖驛郵遞及征行並不得偏差遣帖助若要須供  
擬任臨時率戶出錢市買定戶及差重色役亦不須以  
馬充財數

十一年勅諸州府馬闕數稍多既合官填復須私備貧

兵力致實以為難宜令所司即勘會闕數與閑廄使計會取監牧馬充

天寶十一載十一月勅兩京去城五百里內不得置私牧如有一切官牧

十三載六月隴右羣牧都使奏差判官殿中侍御史張通儒副使平原太守鄭遵意等就群牧交點摠六十萬

五千六百三頭匹口

馬三十二萬五千七百九十二匹  
內二十萬八千匹草牛七萬五千

一百一十五頭內一百四十三頭  
羴駒五百六十三頭  
羊二十萬四千一百三十四口  
騾一頭

肅宗至德二年十二月詔園苑內有閑廐使摠監各據所管地界耕種收草粟以備國馬

代宗大曆十四年七月復置廐馬隨仗於月華門

德宗建中元年五月詔市關輔之馬牝牡二萬匹以實內廐

貞元八年裴延齡為戶部侍郎判度支京西有汚地卑濕處時有盧葦生不過數畝延齡忽奏云廐馬冬月合在槽櫪秣飼夏中即須有牧放處臣近尋訪得長安咸

陽兩縣界有陂池數百頃請以為內廩牧馬之地且去  
京城數十里亦與廢苑中無別帝初信之言於宰臣宰  
臣堅執云恐必無此及差官閱視事皆虛妄延齡既慚  
且怒

二十年福州都團練觀察使柳冕奏置萬安監牧泉州  
界置羣牧五悉索部內馬五千七百匹驢騾牛八百頭  
羊三千餘口人心擾焉

順宗以貞元二十一年即位四月罷閩中萬安監先是

福建觀察使柳冕久不遷欲立事跡以求恩寵乃奏云  
閩中南朝放牧之地畜牛馬可使滋息請置監許之遂  
收境內畜產令吏牧其中羊之大者不過十斤馬之良  
者錢數千不經時輒病死又斂以充之百姓告乏遠近  
以為笑至是觀察使閻濟美奏罷之

憲宗元和四年正月右神策軍奏絳州龍門臨河鄉河  
曲無居人田業請為牧地從之仍禁侵蹂居人田業  
十一年正月命中官以絹二萬疋市馬於河曲

十三年十一月賜蔡州羣牧號龍陂以刺史丁俛充使  
十四年五月置臨海監牧使命淮南節度使李夷簡兼  
之

八月襄州穀城縣置羣牧賜名臨漢監以山南東道節  
度使孟簡兼充監牧使

穆宗長慶二年四月詔如聞館驛遞馬死損轉多欲令  
提舉所繇悉又推注中使郵驛稱不見券則隨所索盡  
供既無憑繇豈有定數方將革弊貴在息詞自今已後



中使乘遞如不見券及券外索馬所繇輒不得供其常

參官出使及諸道幕府軍將等所合乘遞並須依格式

如有違越或分外科人夫並宜具名聞奏

當時中人出使所在多微

驛馬大其行李驛馬繇此死傷多假如軍期急奏行人所乘馬多為格奪遠近苦之因有是命

文宗太和二年十月勅海陵是揚州大縣土田饒沃人

戶衆多自置監牧以來或聞有所妨廢又計每年馬數

甚少若以所用錢收市則必有餘其臨海監牧宜停令

度支每年供送飛龍使見錢八千貫文仍春秋兩季各

送四千貫充市進馬及養馬飼見在馬等用其監牧見在馬仍令飛龍使割付諸羣牧收管訖分析奏聞

是月甲戌命中使往龍陂監取馬五百匹賜徐州行營三年三月以沙苑樓煩馬共五百匹賜幽州行營將士七年正月山南東道節度使裴度奏請停臨漢監牧從之臨漢牧元和十四年置有馬三千二百餘匹廢百姓田四百餘頃前後節將不能別白條陳奏至度始奏罷十一月壬午度支鹽鐵使王涯奏請於銀州置銀川監

牧使以刺史劉源充使從之

開成元年二月以飛龍馬二百匹賜京兆府充給諸驛  
四月戊寅邕管經略使裴恭上言洞賊雖深居山谷當  
其劫掠多在平地防禦之道切在馬軍請賜草馬二百  
匹置監牧以為備詔以度支錢三百萬逐便賜之

二年七月夏州節度使劉源奏自太和七年十一月一  
日於銀川置監城收管群牧今計孳生馬七千餘匹今  
饒州南界有空閒地周廻二百餘里四面懸絕賊路不

通只置三五十人守其要害即牧放無虞是臣當管界內並非百姓佃食請割隸監司久遠之計詔委本道節度使差人與判使勘驗如實無主使任收管仍不得侵奪居人田產

四年十月飛龍進諸監牧二歲馬二千七百匹

哀帝天祐三年十一月勅牛羊司牧管御厨羊并乳牛等御厨物料先是河南府供進其肉便在物料數內續以諸處送到羊且令牛羊司逐日送納今知舊數已盡

官吏所繇多總逃去其諸處續進到羊并舊管乳牛並送河南府牧管其牛羊司官吏並宜停廢

梁太祖開平元年九月詔先以討伐北虜因索公私馬以濟戎事至是慮有搔擾復罷前令如有力者任畜馬四年十月頒奪馬令先是王師擊賊所得馬雖一二必具獻或被瘡殞於道中而戰者無所利帝曰獲則有之所以要其奮擊也今主將亡馬皆不言取士卒獲以為已功甚無謂宜下諸軍勿來獻擅冒禁者以違勅罪罪

之

後唐莊宗同光三年六月將事西蜀下河南河北諸州府和市戰馬所在搜括官吏除一匹外官收匿者致之以法繇是搜索殆盡

三年閏十二月魏王奏東西兩川點到見在馬得九千五百三十四

明宗即位以康福為飛龍使福便弓馬少事武皇累補軍職莊宗嗣位嘗謂左右曰我本番人以羊馬為活業

彼康福者體貌豐厚宜領財貨可令總轄馬牧繇是署  
為馬坊使大有蕃息及後明宗為亂兵所逼將離魏縣  
會福牧小馬數千匹於相州乃驅而歸命及即位乃有  
此授

天成二年三月丙辰宰臣任圜奏臣伏見番牧臣僚每  
正至慶賀例皆進馬臣以捧日之心貴申其忠孝追風  
之步必擇於馴良備乘奉於帝車資馭駿於天廄伏見  
本朝舊事雖以進馬為名例多貢奉馬價蓋道途之役

護養稍難因此羣方久為定制自今後伏請只許四夷  
番國進駝馬其諸道藩府州鎮請依天復三年已前許  
貢綾絹金銀隨土產折進馬之直所貴稍便貢輸不虧  
誠敬兼請約舊制選孳生馬分置監牧俾飲齧而自遂  
即駝牝之逾繁者勅旨任園方秉國權乃專邦計公家  
之利知無不為當景運之中興舉皇朝之政事不獨資  
其經費亦異便於貢輸載閱敷陳允叶事體宜依所奏  
乃置監牧委為三司使別其制置奏聞



三年三月吏部郎中何澤請率天下牝馬置羣牧取其蕃息

四年四月詔沿邊置場買馬不許蕃部直至闕下帝自臨馭欲來遠人黨項之衆競赴都下嘗賜酒食於禁庭醉則連袂歌土風以出凡將到馬無駑良並云上進國家雖約其價以給之及計其館穀錫賚所費不可勝紀計司以為蠹中華無出於此遂止之

是年八月詔以右軍馬牧軍使田令方芻牧不謹馬瘠

而多死劾致於法安重誨奏曰令方損耗官馬死未塞責然因馬罪死一軍使非撫士之道杖減死一等

長興元年七月分飛龍院為左右以小馬坊為右飛龍院

三年正月三司奏從去年正月至年終收到諸番所賣馬計六千餘匹所支價錢及給賜供費約數四十萬貫四年十月帝問見管馬數范延光奏曰天下嘗支草粟者近五萬匹見今西北諸番部賣馬者徃來如市其郵

傳之費中估之價日四五千貫以臣計之國力十耗其  
七馬無所使財賦坐銷朝廷將不濟馮贊奏曰金商州  
每年上供絹不過六百疋臣給馬價每日約支五千餘  
疋臣等思惟無益之甚乞陛下深悟其理帝曰卿等商  
略可否以聞延光等議戒緣邊鎮戍番部賣馬即擇其  
良壯給券具數以聞從之

十一月朱弘昭馮贊奏曰臣等自蒙重委計度國力盈  
虛而支給嘗苦不足者直以賞軍無算買馬太多之弊

也若不早為節限後將難濟宜嚴勅西北邊鎮守此後請禁止其來

晉少帝天福九年正月發使天下率公私之馬

漢高祖天福十二年九月河南諸道並奏使臣到和買戰馬始帝去冬以北虜犯關陷戰馬二萬匹而騎卒在馬時方欲攻鄴壘而制塞下遂降和買河南諸道不經虜掠處土人私馬時制旨略曰朕方以勤儉一身輯和庶政未嘗枉費所在安人今則重威未賓契丹尚擾必

多添於戰騎期大振於軍威言念煩勞事非獲已時天下人心厭虜燔灸之患久矣皆願以身為捍聞帝詔諭皆感悟樂而隨之

周世宗顯德二年八月帝謂侍臣曰諸軍與飛龍院馬向來有病患老弱者多為其主者無故擊殺分食其肉豈可壯則乘騎貴其負重之力老則見棄不免刳宰之患忘其勞而枉其死寔有所傷今後應有病患老弱馬並可送同州沙苑監衛州牧馬監就彼水草以盡其飲

齷之性

冊府元龜卷六百二十一